

Date – 18/09/2024

Time - 18:30 -18:40Hrs

REGIONAL NEWS BULLETIN

HEADLINES (EVENING)

1. Tuialhthei phur lirthei neitu pawl 2 ten Kawnpui leh Sairang inkar Kawng chhia avanga Tuialhthei phurh an chawlhdan chu naktukah pawh chhunzawm nise, an ti.
2. Kolasib District Land Owners' Association hruaitute chuan Forest Dept nena thu inhmuhlohna karah Kolasib District mipuite dinhmun a rang lama a chinfel vat a tul an ti.
3. Prime Minister Modi-a sawrkar term thumna ni 100 chungin Prime Minister Employment Generation Programme (PMEGP) hnuaiiah loan cheng vaibelchhe sang thum za leh 48 pek chhuah tawh a ni.
4. Aam Aadmi Party chuan party hruaitu Atishi chu Delhi Chief Minister thar atan an ruat.

<><><>

NH 306 SITUATION

Mizoram Oil Tanker Drivers' Association (MOTDA) leh Petroleum Entrepreneurs' and Transporters' Union of Mizoram (PETUM) chuan Kawnpui leh Sairang inkar Kawng chhia avanga Tuialhthei phur lirthei ding mek chu chhunzawm zel nise, an ti.

Pawl 2 hruaitute hian nimin khan Vairengte ah Jt meeting an nei a, National Highway 306, Kawnpui leh Sairang inkar Kawngpui chu Tuialhthei phur Lirthei te tana chetsual hlauhawm khawpa a chhiat avanga Oil Tanker-te an tlan tir ngam lo a, kawng siamthat hna thawktuten Oil Tanker-te tlan ngam khawpa an siam that hma chu tlan loh zel ni se, an ti a, Oil Tanker tlan ngam tura siam that a nih hunah Oil Tanker zawng zawngte tlan chhunzawm leh chauh nise an ti.

Kawng siam that mek dinhmun chu tunkar zirtawpni hian a hmunah en ho leh nise an ti a, Vairengte Police Checkgate atanga kan corr thudawn danin, nimin khan Lengpui Airport a thlawhna in a hman tur Tuialhthei phur trip hnih- phai lam atanga lo lut chuan Vairengte Checkgate a paltrang a, hei bak hi nimin leh vawiina tuialhthei phur lirthei lo lut a awmlo a ni.

Hetihlai hian Mizoram Truck Owners Association leh Mizoram Truck Drivers Association hruaitute nen an lo sawi ho tawh angin, PWD Minister Pu Vanlalhlana chuan vawiin khan National Highway (NH) 06, Kawnpui leh Khamrang inkar kawng chhia chu a hmunah tlawhin hmalakna kal mek a enfiah a, kawng siamtura hmachhawpte Official leh hemi kaihhawih lirtheia

eizawngte a sawipui a. Heng bakah hian Kawnpui quarry bul leh Sethawn RTP peng bula NHIDCL kawng siam avanga harsatna thlengte a enfiah nghal bawk. PWD Minister hi Dy. Speaker Pu Lalfamkima'n a tawiawm a ni.

Pu Vanlalhlana chuan NH 06 chu Mizoram chak lakna kawngpui pawimawh tak a nih avangin kawng chhiate hmanraw neih ang ang pawt khawma theihtawp chhuaha buaipui a nih thu a sawi a. PWD hotute chu hmalaknate uluk taka vil reng tura chahin, kawng chhia in a nghawng mipuite te chu kawngpui tha nei tura Sawrkar hmalaknate thlawp tlat turin a sawm a. Kawng chhiate a ranglama thawmthat thuai tum a nih thu sawiin, kawng siam leh thawmthat hna thawh a nih chung hian harsatna tawk palh an awm pawhin kan zavaia tana tha tur a ni tih hriaa lo hrethiam hram hram turin a ngen a ni.

He huna thurel bawhzuiin NH 06 Khamrang leh Kawnpui inkar kawng chhiate chak zawka siamthat a nih theih nan lirthei tangkhang mekte chu waviina chhuah tir vek hman tura hmalak nghal a ni a. Naktuk atangin ni thum chung lirthei eng chi mah tlan tlang tir lovin ngawrh lehzuala kawng siam hna thawh nise tih a ni bawk a ni.

Hemi atan hian PWD lamin tuna an hman mekte bakah kawng siamna hmanrua leh thawktu tam zawk a ngaihtuah belh nghal a. Hemi hnuah harsatna a awm a nih chuan ruahmanna thar siam leh nise tih a ni. Heng bakah hian kawng siam nana pawimawh lungchang leh POL te a thlen zung zung theih dan turte, lirthei veivakte awmze nei zawka buaipui dan turte pawh sawiho a ni a. NHIDCL enkawl kawngpuia harsatna thlengte chu a tul angte bawhzui thuai tura hriattir nise tih a ni bawk.

<><><>

PADDY PROCUREMENT SCHEME

Mizoram sorkar Bana Kaih Policy nen kal kawp turin Mizoram thar chhuah buhum ah sorkarin support price a pe dawn a. A bultan nan kuminah Kolasib leh Mamit district ah kalpui phawt tur a ni.

Vawiin khan Chief Minister Pu Lalduhoma hovin Mizoram State Government Paddy & Rice Procurement Committee te chu CM Office-ah an thukhawm a, Mizorama buh chingtuten hlawk ve tawk taka an buhum an hralh theih dan tur a ngaihtuah a. An lo zirchian tawhna behchhanin ruahmanna an siam a, buhum lei dan tur kimchang hi naktukah Hand Holding Scheme hawnaah puan a ni ang.

He meetingah hian Ration Card var neitute hnena subsidy rate thar kumin October thla atangin Mizoram pumah kalpui tan a nih tur Supply Minister Pu B. Lalchhanzova chuan a sawi a.

Sawrkarin Card var tana subsidy cheng 25 a pek thin chu thla thar October atangin cheng 10 a pek tan a tum a. Mizoram pumah Card var ho tan buhfai khul man cheng 30 a ni tawh ang.

October thla atang vek hian Retailer te lawmman pawh kg khata duli ni thin chu chengkhat leh duli ah tihsan a ni tawh ang.

<><><>

KOLASIB LAND OWNERS ASSN

Kolasib District Land Owners' Association hruaitute chuan Forest Dept nena thu inhmuhlohna karah Kolasib District mipuite dinhmun a rang lama a chinfel vat a tul an ti a, hemi ti hlawhtling tura nawr nan kawngpui dan chah an tum tih an sawi.

Vawiin khan Kolasib Press Club-ah Chanchinbumite kawm in, Kolasib District Land Owners' Association hruaitute chuan kum thum hmalam atangin ram inchuhna avanga buaina leh harsatna an lo tawh tawh thu leh Mizoram sorkar pawh vawi engemaw zat an dawr hnu ah tun thlenga an harsatna chinfel sak an la nih loh avangin an thil ngiat nawr nan tun thla ni 25 zing dar 6 atangin tiam chin awmlovin RTP Farm, Sethawn ah NH-06 leh NH-306 (Silchar leh Aizawl inkar) Kawngpui danchah an tum thu an puang.

Land Owners' Assn hruaitute thilphut zingah Ram neitu nihna sorkarin chingfel se tih te; Riverine Reserved Forest (RRF) Notification 1965 chu thiah ni rawh se tih te; Kawngpui thlur li Project tihhlawhtlin ni rawhse tih leh Kum 3 chhung hmala thei lova an khuahkhirhna sorkar in sut rawh se, tih a ni.

Land Owners' Assn hruaitute sawi danin, Kum 2021 khan Gauhati High Court chuan RRF Notification 1965 chu hman tlak loh leh awmze nei tawh lo; mihring chenna hmun In leh Lo in a khat tawh, tiin a thiat a, Hei hi Forest Dept chuan pawm lovin Court in a zir chianna ah he RRF Notification hi Dan diklo a puan a ni, tiin tih nun leh tumin an bei a. Tunhnai ah Environmental NGO te pun in Supreme Court ah an zualko leh a, chu chu Mizoram sorkar pawhin kumin June thla vel khan thlawp in, he RRF Notification hi stay an dil zui ta a ni an ti,

Land Owners' Assn hruaitute chuan, tun dinhmunah Vairengte leh Sairang inkara cheng mipuite chu RRF avangin an him lo a, an chenna in, huan leh ram ti a an lo cheibawlte chu Forest Dept in a chhuhsak mek a ni an ti. Reserved Forest a chengte chu Dan lova awm leh hnawhchhuah theih reng an ni, tiin, State sorkar chuan Kolasib District mipuite dinhmun a rang lama a chinfel vat a tul a ni, an ti bawk.

Land Owners' Assn hruaitute chuan, kum 2020 atangin Four Lane atana ram lak tur avangin sorkarin ram neitute ram chu khawih theih loh in a khuahkhirh sak ni a tarlangin, chhungkaw tam takin eizawn nana an hman an huan thlai te enkawl zui thei lova sorkar in a siam avangin an mangang takzet tawh niin an sawi bawk.

Chanchinbumite an kawmna ah hian Land Owners' Assn JAC Chairman Pu James Vanlalringa; Vice Chairman Pu Malsawmthanga; Secretary Pu Lalnuntluanga Colney leh hruaitu thahnem tak an tel ani.

<><><>

NPS VATSALYA PENSION SCHEME

Finance Minister Nirmala Sitharaman in NPS Vatsalya pension scheme, Narendra Modi 3.0 sorkar Union Budget hmasa bera puan vawiina a tlangzarh chu ramchhung hmundangte rualin Champhaiah pawh hman a ni.

Champhai ah chuan Comprehensive Venglai Middle School ah hman niin, Venglai Middle School Principal Rualkhuma Hmar chuan a kaihruai a, NABARD, DDM, Champhai H Lalhmachhuani chuan NPS Vatsalya pension scheme chungchang sawiin NPS Vatsalya hian nu leh pate chu pension account-a sum dahin an fate hmalam hun atan sum khawlkhawm theihna a siamsak dawn a, compounding thiltihtheihna hmangin hun rei tak chhunga hausakna an neih theih nan a puih dawnthu te, NPS Vatsalya hian contribution leh investment tih ttheih hrang hrang a pe a, nu leh pate chuan investment kum tin naupang hmingin cheng sang 1,000 chauh pawh pek theih a ni a, chu chuan sum leh pai lama harsatna nei chhungkaw tan pawh a hman theih phah dawn thu te a tarlang a ni.

He hmalakna thar hi naupangte sum leh pai lama humhimna tura ruahman a ni a, India pension system-a hmasawna pawimawh tak a ni. He

Scheme hi Pension Fund Regulatory and Development Authority (PFRDA) hnuaiiah kalpui a ni ang.

NABARD)leh Lead Bank Office, Lunglei te buatsaihin Lunglei Venglaia Graceland English School-ah he ruahmanna chungchang zir hona, FIF Awareness Programme on NPS Vatsalya Scheme hun hman a ni bawk a.

Lead District Officer Pu R. Lalmalsawma chuan kaihruiin, NABARD Lungleia District Development Manager Pi Chiinngaihkim Phiamphu chuan NPS Vatsalya Scheme chungchang a sawifiah a, he Scheme hnuaiiah hian kum 3 account tihnun a nih chuan pawisa dah luh aṅanga zaa 25 lak chhuah theih a nih tur thu leh account holder a thih chuan an nu leh pate'n an pawisa dahte an lak let theih tur thu a sawi bawk.

He FIF awareness programme-ah hian Graceland English School zirlaite leh zirtirtute an tel a. Zawhna leh chhanna hun hman a ni bawk.

<><><>

PLEDGE

Rampum huapa Swachhta Hi Seva campaign neih mekah wawiin khan Indian Institute of Mass Communication (IIMC), North Eastern Regional Campus Aizawl ah fai tura intiamna sawirual a ni . He hunah hian IIMC Regional Director Prof.N Sushil Singh-a hovin faina beihpui thlak tura thutiam Swachhta pledge sawirual a ni. Swachhta Pledge intiamnaah hian IIMC zirlai leh thawktute an tel a ni.

<><><>

ONE NATION ONE ELECTION

Sawrkar laipui chuan High Level Committee ten rampumah inthlanpui aruala neih tura rawtna a siam One Nation, One Election chu a pawm. Wawiin khan New Delhi-ah hemi chungchang chanchinbumite hmaah Union Information and Broadcasting Minister Ashwini Vaishnaw chuan sawiin President hlui Ram Nath Kovind-a kaihruiia high-level committee din chuan hun rei tak chhung ngaihtuahin a kaihnawih mi hrang hrangte an kawm a. Heng zingah hian Political Party leh mithiamte pawhrawn an ni a ti a. One Nation One Election hi thawh hniha neih tur a ni a. A thawhkhatnaah hian Lok Sabha leh Assembly inthlan a ruala neih a ni ang a. Local body election Panchayat leh municipality te chu ni 100 chhunga neih leh tur a ni ang.

Union Minister chuan Chandrayaan-4 Mission leh Venus Orbiter Mission pawh pawm anih thu a sawi a. Pradhan Mantri Janjatiya Unnat Framme Abhiyan cheng vaibelchhe sing 7 sang 9 leh 156 senna tur pawh Union Cabinet chuan pawm bawkin tribal te tana hmasawna tur scheme a ni a. National National Centre of Excellence for Animation, Visual Effects, Gaming, Comics, and Extended Reality dinna tur pawh Union Cabinet chuan a pawm bawk a ni.

<><><>

MANIPUR

Sawrkar laipui chuan ni 100 kalta chhung khan Manipur-ah remna a awm theihna turin kawng hrang hrangin hma a la. Union Home Ministry atanga thudawn danin Central Reserve Police Force (CRPF) battalion hnih leh Central Police force company 200 chuang Manipur ah hian dahluh an ni a.

Union Home Minister Amit Shah-a hovin Manipur-a venhimna dinhmun hi enho reng niin a tul angin hmalak zel a ni.

Hei bakah hian sawrkar laipui chuan India leh Myanmar inkara zalen taka inkalpawh theihna Free Movement Regime (FMR) pawh a titawp a. Cabinet Committee on Security chuan ramri hung a pawm tawh bawk a ni.

<><><>

J&K ELECTION

Vawiin khan Jammu & Kashmir Assembly inthlan thawhkhatna atan vote thlak a ni a. District pasarih huamchhungah inthlan hi neih a ni a. Hriat theih chinah tlai dar 3 thleng khan vote zaa 50.65 a tla tawh a. Zing dar 7 atangin vote thlak niin Assembly bial 24 ah inthlan buatsaih a ni a. Tun tum hi Article 370 paih anih hnua Assembly inthlan neih leh hmasak ber a ni.

<><><>